



MARYMA

Ramhlun North YMA Chanchinbu

“YMA thuvawn: YMA chu tanpui ngaite tanpuitu”



YMA thiltum: 1. Hunawl hman that. 2. Zofate hmasawna ngaihtuah. 3. Kristian nun dan tha ngaihsan

Vol. 44

Issue No. 17

Ramhlun North: Ni 25 April, 2026



SECTION THU THAR

■ **Saizahawla Section:** Ni 28.04.2026 (Thawhlehi) zan dar 7:00 ah Chawngbawla Run ah Committee neih tum a ni a, member te hun remchang insiam turin an in ngen e.

■ **Chawngbawla Section:** 21.04.26 (Thawhlehi) chhunah section bungraw dahna en fel leh rem fel hnatlang neih a ni a, zanah committee neih nghal a ni.

■ **Khuangchera Section:** Ni 23.4.2026 (Ningani) zan khan Section gas thuk chhia te siamtha in OB te an hnatlang.



CYMA THU

■ Reliance Foundation-in Formosa Foundation, India kaltlanga Central YMA hnena Ambulance 8 an hlan chu Saitual ah a dawngtu turte hnena hlanna hun hman a ni a, he hunah hian Pu R. Lalngeta President, Pu S.F. David Ngursangzuala Asst. Secretary, Er. H. Duhkima Treasurer, Pu M.S. Ralte, Fin. Secretary te bakah CEC member thahnem tak an tel. Central YMA kaltlanga Ambulance dawngtute chu - Tuipuiral Group YMA, Tuichangral North Group YMA, Zawlbuk Group YMA, Tuivai Group YMA, Kawlkulh Group YMA, Vanapa Group YMA, Tuiphal Group YMA, Chalfilh Group YMA te an ni.

■ Planning & Programme Implementation Deptt. bultumin Aijal Club-ah KMMTTP leh Sairanga Rail lo lutin mipui min nghawng dan tur zir hona neih a ni a, Prof. Malsawmliana Gen. Secretary a tel.

■ Synod Committee Room 1-ah MPF Governing Board meeting neih a ni a, Pu S.F. David Ngursangzuala, Asst. Secretary a tel.

Library duty turte:

1. Lalrinawma, N-Sec.
2. Vanlalhruaii, N-Sec.
3. Lalrinsiami, N-Sec.
4. Lalbiakhlui, K-Sec.
5. Nancy Zonunthari, K-Sec.
6. Lalnunfeli, K-Sec.

AMC INTHLAN TLUANG TAKA NEIH A NI

Ramhlun North, the 25th April, 2026: Aizawl Municipal Corporation (AMC) Inthlanpui vawi 4 na ni 21/04/2026 (Thawhlehi) a vote thlak chu tluang taka neih zawh a ni a, heng ward 19 huamchhungah hian voter 2,39,985 awmin mi 1,50,640 in vote an thlak a, za zelah 63 % vote a tla a ni. AMC huamchhungah hian Ward 19 a awm a, Ramhlun North pawh hi Laipuitlang, Ramhlun Vengthar, Ramhlun Venglai leh Ramhlun Sports Complex te nen Ward III huamchhungah a awm a ni. Ward III bikah hian voter 12,502 atangin vote 7,685 vote a tla, za zelah 61 % a ni bawk. AMC Inthlanpui hlawhtling leh felfai taka neih anih theih nan LLO/BLO te, MPF (Mizoram Peoples Forum) te leh Political party hrang hrangten joint meeting te nein inlungual takin hma an la ho a, Kohhran Thalai Pawl te pawh inthlanni ah mipuite tanpui an ngaihsan tanpui turin an duty bawk. Kan veng Ramhlun North ah hian Polling Station pathum, Govt. Aizawl North College, Govt. Model Ramhlun North P/S leh Govt. Endala M/S te nein heng polling station ah te hian Polling Booth pahni theuh an awm bawk. Hetiang hi Ramhlun North a vote tlak dan dinhmun a ni :

Part No.	Vote awm zat	Vote tla zat	%
I	1144	699	61
II	974	624	64
III	1084	664	61
IV	507	340	67
VI	649	430	66
VI	798	507	64
TOTAL	5156	3264	63

MATRIC RESULT TIH CHHUAH A NI

Mizoram Board of School Education (MBSE) chuan ni 23.04.2026 (Nilainii) chhun dar 12 khan High School Leaving Certificate (HSLC) Examination 2026 result a tichhuak a, zirlai exam 18,257 zinga 14,663 an pass a, pass percentage 80.31 niin, nikum lam (76.68 %) aian an pass tha zawk.

14th Mizoram Education Reforms chuan kumin atang hian MBSE Pawl 10 leh pawl 12 board exam result-buah Top Ten leh Division ti lang tawh lo turin thuthlukna a siam a, School hming hnuaiah zirlai pass te hming leh roll number chiah tarlan a ni tawh a ni. He hmalakna hi inelna thianglim a nih rualin zirna tha zawk a awm theihna atan tih a ni a, school tam takin Board exam result tha an duh avanga pawl 9 leh pawl 11 zirlai hlamchhia a, pawl 10 leh pawl 12 zawhna hlui zir a, naupangte by heart system a an kal tir thin tih bo nan leh naupangin a thluak leh a rilru a hman theih tak tak na, competency based learning hmanga zirlaiten competitive exam hrang hrang NEET, JEE leh a dang te an hmachawn theih nan hetiang hian kalpui a ni.

Kan veng atangin school 5-in Matric Exam hi an hmachawn a, an result tlangpui chu hetiang ani:

School	Apprd	Pass	Dist	I Div	II Div	III Div	Pass %
Govt. HR-HS	20	12		2	8	2	60%
Holy Child School	26	26	4	14	8		100%
St. Joseph HSS	209	209	130	79			100%
St. Stephen HSS	22	21	2	9	8	2	96%
Northern Academy	8	7		5	2		88%

LAWMPUINA LEH DUHSAKNA

Mizoram Board of School Education in Pawl 10 result a tih chhuah a, kan bial Aizawl North II huam chung a zirlai Pawl 10 Exam beitu hlawhtlinna chang zawng zawng te ka lawmpui che u a, in kal zelna turah duhsakna ka hlan a che u.

Chutih mek laiin hlawhtling zo ta lo te in awm hi pawl ka tiin ka tawrhpu tak zet che u a, beidawna khura min hruaitu ni lova tumruhna leh rilru thar min put tirtu anih zawk ngei theih na turin duhsakna ka hlan bawk a che u.

Zirlaita tana thahnemngai tak a tha leh zung, rilru leh ngaihtuah seng a inpe em em Zirtirtu zawng zawng te chungah pawh lawmthu ka sawi bawk a, zirna kawnga ramin hma a sawn zel theih nan a tan la zel turin Zirtirtu zawng zawng te ka chah nghal bawk a che u.

Dr. VANLALTHLANA
MLA, AIZAWL NORTH II



INLUNGRUAL TAKIN LE

Inthlan hi democracy ramah chuan mipui duhthlanna lanchhuahna leh hmasawna tura kalphung pawimawh tak a ni a, hemi hmang hian kan hmabak hruaitu turte leh kan duh dan te kan lantir thin. He inthlan boruak a zawh hnu hian ngun taka kan ngaihtuah tur leh kan hriat reng tur chu, inthlan hi hun khat atana duan, kan kalphung pangngai a thleng thin a ni a, kan khawtlang nun erawh nitin leh kan dam chhunga kan chenchilh tur a ni thung tih hi a ni.

Veng khat, hlim ni leh lungngaih ni pawh a inlawiawm reng tur kan ni a, inthlan zawh hian mimal leh chhungkaw inkarah inthliarna emaw, inhmelmakna emaw a luh thuk loh nan kan fimkhur a pawimawh hle. Politics ah chuan thlir dan hrang hrang kan nei a, chu kan thlir dan chu midang nena a inkalh chang a awm fo thin. Chutiawng bawkin kan duh thlan pawh a hrang vek thei, amaherawhchu hei hi democracy hlutna pakhat a ni thung si. Mahse, chu kan ngaidan hrang chuan kan Mizo tlawmngaihna leh inlungualna a then hran erawh a thiawng lo hulhual. Vote kan thlak tawh a, duh thlan kan nei tawh a, tunah chuan kan hma lawka kan thlan tlinte, hruaitu tharte leh kan khawtlang hruaitute nena thawk hova, kan veng hmasawna tura ke kan pen tlan hun a ni tawh zawk a ni.

Veng hmasawna hi hna namai a ni lo va, thawh tur pawh a tam hle a ni. Hma sawn tur chuan inlungualna hi a pawimawh a ni. Inthlan laia kan inbeihna leh rilru natna te dah tha in, kan Mizo nunze mawi, 'tlawmngaihna' thilnung nen inngaidam tawn ila, hmalam kan pan a hun ta takzet a ni.

Thil thar beisei a kan hma lam kan thlir lai hian, inthliarna leh inhuatna rilru paih bo ila. Mimal leh party induhsakna hian hmasawna thuantling a thlen ngai lo a. Hmasawn tur chuan khawtlang mipui inlungualna leh inlungual taka thawhhona a pawimawh zia hriain helama ke pen turin i inbuatsaih tlang ang u.



KHAWTHLIR

NUCHHIMI

Hmanlai chuan Nuchhimi te unau hi an awm a. Ni khat chu Nuchhimi nu chuan, 'Nuchhim, vawin chu i nau nen i ni vawksa va pe ang che u,' a ti a. Ani chuan, 'Ka ni in kawng ka hre lovang e,' a ti a. A nu chuan, 'Va kal zel ula, kawng peng a lo awm ang a. Lehlam chu a fai hliu hliau anga, lehlam erawh chu a hnawk nai nuai ang. A fai lam chu i ni kawng a ni a, a hnawk lam chu Hmuichukchuriduni kawng a ni a, a fai lam zelah in kal dawn nia,' a ti a.

Chutia an sawi lai chuan bang chhakah Hmuichukchuriduninu chuan a lo ngaithla reng a. A tlan haw a, ama kawng chu a lo phiat fai sawk sawk a, Nuchhimi ni kawng chu a lo tihnawk vek a. Nuchhimi leh a nau chu a ni sa pe tur chuan an chhuak ta a. A fai lam apiang chu a ni te kawng nia ringin an zawh zel a, a tawpah chuan Hmuichukchuriduninu inah chuan an lut ta hlawl mai a, vawksate chu an pe a.

Nuchhimi chuan a ni chu ni lo chuan a hre hle mai a, mak a ti rilru hle a. Hmuichukchuriduninu chuan a ni ang takin a lo be si a: 'Ekhai, in lo zin a ni maw, inngat rawh u, in hah dawn tehlu nen,' te a lo ti vei chul a. Khua a lo thim a, mut a lo hun dawn chuan Hmuichukchuriduninu chuan, 'Nuchhim, i nau hi a te deuh va, ka mutpui ang a, nang zawng nula i ni a, khumâiah khan mu ang che,' a ti a, tichuan an mu ta a.

An han muhil dawn ser ser a, Hmuichukchuriduninu chuan Nuchhimi nau chu ei a tum a, a hmui zum pui mai chu a kher ta ngur ngur mai a. A na ti chuan, 'Ka u, ka u,' a ti tuar tuar a. Nuchhimi chuan, 'Eng nge ni bawih?' a ti a, Hmuichukchuriduninu chuan, 'Engmah a ni hlei nem maw le, sùhângin a seh mai a ni e, mu hle hle rawh,' a tihsan mai a. Zanlaiah chuan a kher hlum a, Nuchhimi nau chu a ei zo ta vek mai a. A lu ruh leh a ngal ruh te, a ban ruhte chu a lungthuah a tungkhawm rum mai a.

Khua a lo var a, Hmuichukchuriduninu chuan, vin deuh mai hian, 'Nuchhim, mei va chhem rawh' a ti a. Nuchhimi chu a tho va, mei a han chhem dawn a, a nau ruh chu a hmu a, a tap a tap ta a.

Hmuichukchuriduninu chuan, 'Nuchhim, eng nge i hriat a, i tah kerh kawrh ni, mei kha chhem âlh reng reng rawh,' a rawn ti leh a. Ani chuan, 'Ka tap love, mei a khu em a, ka mittui a tla mai a nia,' a ti a.

Tukthuan eikhamah chuan Hmuichukchuriduninu chuan Nuchhimi chu a phuar a, bawmrangah a chilh tlat a, khanchhukah a khai a, chhung lam leh pawn

lamah kawng a kalh khum a, a fehsan ta a. Nuchhimi chu chhuak thei lovin mangang takin a awm a, chutih lai chuan Chaite hian eng lo a rawn tih tlak ér ér a. Nuchhimi chuan, 'Chima, bawlhhlawh mi tihtlak khum lo chuan ka bawm khaina hrui hi han seh chat la, ka chhuak daih ange,' a ti a. Tichuan, chaichimte chuan a seh chah sak ta vek a, Nuchhimi chu an in lamah a tlan haw ta vang vang a.

A nu te hnenah chuan Hmuichukchuriduninu in a lo nghaisak dan zawng zawng chu a hrilh vek a, an thin a rim em em mai a, 'Phuba kan la ang,' tiin Hmuichukchuriduninu nghaisak dan tur an ngaihtuah ta a. A inah an va kal a, a lo awm lo hlauh mai a. A thukah artui an phum a, a pawnpui karah taivang bu an dah a, a tuium chhungah rultuha an dah a, a bang laiah tlahthi an thiat khat thung a, a sahriak bûrah sihsen an dah a, a tungchawah thil tenawm an tat luai bawk a. Kawngka lam chhak ah sùk an tung a, a kailawn hnuaiah ui kawlh leh kel kawlh an thlung a. Chaichim hnenah, 'Chima, Nuchhimi lemah lo chang la, a chhan ai lo chhansak zel ang che,' an ti a, an kalsan ta a.

Tlaiah chuan Hmuichukchuriduninu feh chu a lo hawng a. Sakhi puar hi a nung chungin a man a, a rawn phur ut ut a; haw kawngah chuan ruahpui vanâwnin a nan nek bawk si a, a sumhmun lo lut chuan, 'Si si si, Nuchhim, kawng mi va hawn thuai rawh,' a rawn ti a, Chaichim te khan, 'Engtin nge ka hawn theih ang, khanchhukah mi khai daih alawm' a lo ti a. Hmuichukchuriduninu thinrim chuan kawngkhar a bawh thla a, a lut ta a. Chaichim lah chu a rukin mau kaw chhungah a lut ta zeuh mai si a, Nuchhimi awzawng a lo awm tawh bawk si lo chu a hrilh hai a, 'Si si si' ti hloh hloh chung chuan mei a han chhem dawn a. Artui chu a lo puak keh thawr a, a mitah a per ta chiam mai a. Tuium hunna lamah a tlan a, tui a han in dawn a, rultuha chuan a lo chuk a, 'Awi awi awi, a va na kher em, a vawh tehlu nen, ka pawnpuiah tal ka inthawlh teh ang,' a ti a, a han tlan lut a. Taivang bu a tidarh a, an lo seh huai huai a, a na ti lutuk chuan Tungchaw a han vuan a, bawlhhlawh a khawih pherh leh a. Bang laiah a tat dawn a, tlahthi in a lo at a. Sahriak a han hnawih dawn a, sihsenin a lo seh noh noh bawk si a. A mangang lutuk chuan, 'Ka inchung chu thak sip thak sap a tam mang kher e, tlanbo daih tur a nih hi,' a ti a, a tlanhhuak a, kawngka lam chhaka suk chuan a lo vaw vak a.

A leikaah chuan hrilh hai em em hian, 'Ka Nuchhimi chhuak ta bawk, ka sakhi man chhuak ta bawk,' a ti a, a tum vei ulh ulh a. A leika chu a tum chim a, ui kawlh leh kelkawlh chuan an lo si a, an lo seh hut hut a, a thi ta der a. Chuti chuan Nuchhimi te chhung chu thlamuang takin an awm ta a ni.

Editor: Vanengmawia (7085878827); **Jt. Editors:** A. Lalfakzuala, Lalrotluangi Zote, Henry VL Nghilhlova Zote

Manager: Lalremsanga Hnamte (8974845644); **Asst. Managers:** Zodingliana, Lalrinchhana, Lalrinawma

News Editors: Lalrintluanga, Lalrawntluanga, Andrew Lalmalsawma, Samuel R. Lalmangaiha, D. Lianmanga, Vanalremruatpuia Ralte

Circulation Managers: PB Lalhuapzauva, Samuel Lalhlupua, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia

ZIN & HAW

- Pu Lalrochama, Vice President, YMA Sub Hqrs. Kolasib Inkhawmpui Vawi 8-na, Diakkawn YMA Hall, Kolasib a neih hman pui leh Inthlanpui a zin chu a lo haw leh ta.
- Pu Lalremsiama te chhungkua, K-Sec. chu chhungkaw thil pawimawh avangin a hnathawhna hmun Telkatta atangin an lo haw.
- Nl. Zosangpuii d/o K. Lianchhunga, K-Sec. chu a hnathawhna hmun Tuidu, Tripura ah a kal leh ta.
- Dr.C.Lazarliana, T-Sec. chu inentirin Guwahati ah an kal.
- Pi Lalbiakengi, N-Sec. inentira Delhi a kal chu a lo haw leh ta.
- Pi Mary Lalnunpari, V-Sec. chu Shillong ah in check up in a kal.
- Nl. Lalronguri, S-Sec. chu Mumbai ah in check-up turin a kal.
- Pi Lalchhungi, T-Sec. chu chhungkaw thil avangin Kawnpui ah a zin.
- Pu Lalremruata, C-Sec. thil pawimawh buaipui a lo haw chu a hnathawhna hmun Haulawng lamah a kal leh ta.
- Pu R. Lalramlua, S-Sec. thil pawimawh buaipui a lo haw chu a hna thawhna hmun Winchester lamah a kal leh ta.

CADS HMALAKNA

Central YMA Ruihhlo man Report:
 April 18- 24, 2026 chhunga Central YMA hnuai Ruihhlo Do Pawl, Central Anti Drugs Squad (CADS) ten ruihhlo leh a kaihhnawih an man te :
 Heroin (No. 4) Hawng- 41,
 Tictac bur - 59
 Ganja - 9 gms
 Ruihhlo kaihhnawih ah hian mihring 56 khawm niin Excise & Narcotic Deptt ah mi 3 pek an ni a, mi 53 te Counseling Class kal tir an ni bawk.

LEI PIAH LAMAH †

Lalhualhima, K-72 h/o Lalsangpuii, T-Sec. chu ni 18.4.2026 dar 3:05 PM khan a borol a, a ruang hi lumen niin a tuk ni 19.4.2026 chhun dar 12:00 ah Ramhlun North Thlanmual, Zemabawk ah vuiliam a ni.



Lusun khawhar chhungte thlamuantu Pathianin vengin awmpui zel che u rawh se.

DAMLO

- Tv PC Lalmuansanga s/o PC Lalrinmawia, V-Sec. Ebenezer Hospital-a awm chu in lamah in enkawl chhunzawm turin a lo chhuak.
- Pi Lalbiakmawii w/o Lalthanchhunga (Fam), C-Sec.chu taksa lam chak lohna avangin in lamah enkawl mek a ni.
- Mathaia Ralte s/o R. Liansangpui, V-Sec. LRM Hospital-a awm chu in lamah in enkawl chhunzawm turin a lo chhuak.
- Pu Lalawmpuia Tochhawng, V-Sec. chu Aizawl Hospital ICU ah enkawl mek a ni.

MIPUITE NGENNA

Aizawl khawpui chhungah chhiarpui (Census 2027) First Phase (House Listing and Housing Census) kalpui mek a ni a, hlawhtling taka neih a nih theih nan mipuite tanpuina kan ngen a. A hnuai tarlan te hi min tihhlawhtlin sak theih chuan kan lawm hle ang.

1. 1-15 April, 2026 chhung hian mahnia inziah luhna (self enumeration) hun hawn a ni a, chhung tin aiawhte a hnuai link kaltlang hian lo inziak lut vek tura ngen kan ni. <https://se.census.gov.in>
2. 16 April-15 May, 2026 chhungin Enumerator ten in tinah lutin chhiarpui First Phase an nei dawn a, chhungtinten tha taka lo dawng sawng a, zawhna te tha taka lo chhang turin kan inngen a ni.



Aizawl Municipal Corporation

Library Membership Drive 2026

Library Sub-Commt. RN YMA chuan veng chhungah Membership Drive a kalpui mek a, hei hi May thla chanve vel thleng a awng. Member nihna hi chhungkaw khata tu emaw hming ber ziah luh a ni a, chhungkuain a inhman tam theih vek a ni. Chhungkaw pakhatat member pakhat aia tam pawh a nih theih thova, fate hming inkim pawhin a nih theih bawk. Member pakhat hian tum khatah lehkhabu pathum zel khar khat chhung atana hawh theihna a keng tel a ni.

Kuminah hian NGO Library tha thlanna a awm dawna a lan avangin Library enkawltute'n an tang nasa leh zual a. Kan veng YMA Library hi NGO Library tha zingah a lan fo tawh thinna chu chhawm nun an tum hle. Chumi tihhlawhtlinna tura hmachhawp lian ber pakhat chu Membership hi a ni. Tlawmngaia member-a lo inziak lut turin Library enkawltuten min ngen tak meuh a, member-a inziak lut tawhte hnenah pawh thinlung takin lawmthu an sawi bawk.

Library Membership Fee hi ₹ 100/- a ni a hei hi lehkhabu leina, Library tih changtlunna, Visitor lawmman leh inenkawl'n a hman a ni ber. Kuminah hian Inrin ni tinin Visitor 30 - 40 inkar nei ziah ang an ni.

KEIMAHNI

■ Kan Manager, Pu Lalremsanga Hnamte chu taksa lam a insawisel ve deuh a ni awm e, MARYMA chhutna lamah pawh a rawn lang peih meuh lo a, a khaw har thlak hle.

LAWMAWM

- Pu Lalhriatpui leh Pi Zorinnungi, S-Sec. te chuan ni 14.04.2026 khan Durtlang Hospital ah fanu an nei.
- Pu Vanlalzauva leh Pi H.Lalhriatpuii, V-Sec. te chuan ni 7/04.2026 khan Civil Hospital ah fanu an nei.
- Pu Lalbiakdika s/o Dr. Lalhmuchhuaka, K-Sec. chu Assistant Grade ah appointment thar hmu in GAD,SAW (E) ah a post ang.

LOCAL COUNCIL

■ Main Road footpath-ah two wheeler park ching kan la awm a, footpath hi ke a kalna tur a nih angin motor hun phal a ni lo. La dah lui kan awm chuan man zel an ni tawh ang.
 Hrangchhuana High School Compound-ah Transformer thar 250 kva bun a ni a, Chaltlang Tatkawng Veng Transformer leh Industry Mual Transformer (RIP) tih ziaawm na tur a ruahman a ni a, Basic Mual chunglam leh Biak In Mual chunglam thenkhakte chawm tura ruahman a ni.

KOHRAN

■ **Presbyterian Kohhran, Ramhlun North:** Ramhlun North Pastor Bial Inkhawmpui Vawi 45-na chu Ramhlun North Kohhran Biak In ah neih mek a ni. Inkhawmpui hi ni 24.4.2026 (Zirtawpni) zan atangin tan a ni a, Inrinni nileng khan rorel niin Inkhawmpui hi ni 26.4.2026 (Pathianni) zanah a tiak ang.

■ **Salvation Army:** Dt. 26.4.2026 (Pathianni) hi SA IET 109th Anniversary a ni a, hemi pual hian chawhnu dar 2:30 ah Sihphir ah Mual Inkhawm Corps pumhuapin neih ani ang. Tin, he anniversary den chhen hian Inrinni nilengin Biak In leh a chhehvel tihfai Corps pum huap hnatlang neih a ni bawk a ni.

■ **BCM, Ramhlun North:** Naktuk (Pathianni) chawhnu Inkhawmah Kristian Naupang Pawl, Ramhlun North Unit te chuan Rbt. TBC Zaithanpui hovin Spiritual Retreat an nei ang.

Baptist Mipa Pawl, Ramhlun North Unit chuan ni 25.04.2026 khan Unit Sports Tuma Resort, Bung Bangla ah an nei a, Infuih tharna hun Upa C. Lalthumhima, Senior Adviser hovin hmang nghal a ni.

PAWL DANG

■ **Ramhlun North Football Club:** RNFC chuan Academy a hawng dawn a, hemi atan hian admission tih mek a ni a, hmun hma a zauh loh avangin admission ti hmasate duhsak an ni ang.

Admission chungchang hriat duh neih chuan a hnuai contact no. dah ah hian zawhfiah theih a ni.
 Pu Zodinga - 9862109271
 Pu Thantea - 9862375861



ARTICLE

RUIHHLO DO TÛRIN KE I PÊN VE NGAM DÂWN EM?

- Tluangpuii Hmar Zote, Jt. Editor

Mizorama kan buaipui lian tak pakhat, ruihhlovin mihring nun a tihchhiat nasat tawhzia hi. A hnam puma vei tham leh vei tûr a ni a, a do pawh kan do ngam tûr a ni. Kan do lo a nih chuan, engti kawng mahin kan Mizo thalai tam takte hi eng tik hunah nge thlân khur thim lam a pan tîr ang, tih hriat a ni si lo.

Ruihhlo hi YMA leh sawrkârin a do tlat hi a thain, tha thlah ta se tûn aia kan chhiat nasat tûrzia kan hre vek âwm mang e. Amaherawhchu, khawvêl pum en hian khawtlâng tibuaiu lian ruihhlo hi do hneh har pâwte zînga mi chu a ni lo thei lo niin a lang si. Keini ram leh hnam aia chak leh inrêlbâwl tha zâwkte pawh hian theih tâwpa an do chung pawhin an ramah ruihhlovin hmun a khwar reh thei chuang lo va, an la buaipui mêk zêl a ni.

Ruihhlo do kawnga tangkai leh tha ber chu – nu leh pate hi an ni, ti ila a sual âwm lo mang e. Nu leh pate hian fâte enkawlnaah kawng dik an zawh theih nâna theih tâwpa hirih leh kaihhrui hi an tih makmawh a ni. A bâk hi chu, a nihna takah chuan tih theih vak a awm lo. Eng ang pawhin, sawrkârin khapin do mah se, economics lam dân ‘Law of supply and demand’ hi a dikna kan hmu zêl dâwn a ni. Duhtu an awm chuan a petu kha an awm ngei ngei dâwn tihna a ni.

Chûngte avânga ruihhlo ti an awm zêl dâwn tih avâng maia inthlah dul lam kha a dik chuang hek lo va. Ruihhlo do kawngah hian engte nge ngaihtuah tel ngai tih erawh a dotute ber hian an rilrûah an dah tel kha a tûlin a pawimawh a ni.

Ruihhlo do kawngah hian, ti leh thin ila – pawimawh han sawi dawn hi chuan pawimawh tam tak, sawi kim theih loh hi a awm ngei ngei thin a. Chuta, pawimawh deuh pakhat chu ram leh khawtlâng hi a tha leh felfai thei ang bera enkawl a ngai dâwn a, chumi atân chuan dân (law) hi a lal ber a ngai. Dân a tha tâwk lo emaw, kenkawh tâwk a nih loh chuan, dân tihchak leh a kengkawhtu tûrte tha tihchak kha thuneitute mawphurhna a ni ang. Chutiang tûr chuan, YMA tha ngah zâwk leh bân nei sei zâwk a nih avângin, sawrkârin thawk ho tûra a sâwmte a nih ngai chuan thawh hopui kha pawimawh hmasa ber tûr chu a ni.

Chutiang a nih si lohva sawrkâr berin mi dang ring hmasa lêk lova, hna thawk thei lova inngai hi a zia lo va. Ruihhlo do kawngah hi chuan kei mi mâwl, dai kil kâra piang ve mai ngaih dânah chuan, a dotu tûrin bân a nei sei si lo a nih chuan, a nei sei zâwkte tanpuina dila neih sei dân a ngaihtuah a ngai a ni mai. Tanrual hi chakna a ni an tih kha, i hre reng ang u.

Ruihhlo do kan vei ta sa sa, YMA hminga ruihhlo dotute hi an fakawmin an chuanawm hi ka tia. Hlawh nei lo leh phût pawh nei lova thawk an ni a; an inpêkna mawlh hi zah tlâk a nih rualin an ruihhlo dona kawnga dân an bawhchhiat thin avângin a châng pheh hi chuan ruihhlo zuartute aiin dân mitah leh Pathian mitah pawh pawh an khawih nasa thin zâwk hial a; hei erawh a tha lem lo, a thlen tawh lohna tûr leh YMA hmingchhiatna hi hemi kawngah hian tihreh a nih theih nân sawrkâr hian ruihhlo do tûr hian volunteer-a inpe nazawng ring mai lova sum hlawha rawih tûrte hi zawng ta sela, a tha mai lo maw, tih te hi ngaihtuah zui tlâk a ni.

A tâwp ber atân chuan ruihhlo do kum hi puang lo pawh ni se, keini erawh chuan thang lo thar zêl tûrte tân thlahthlam lovin do zel ila. Mizote a zahve dâwn aia tam mah hi ruihhlo ngai an awm tawh hi hria ila, a ni têlin kan liam belh zêl bawk a; nakin lawkah chuan ruihhlo vâng hian kan thalai tam takte hi mual an liam ang, tih sawi theih a ni lo. YMA kan nih angin tho la, harh rawh! Ruihhlo do tûrin, ke i pên ve ngam dawn em? Come on! Shavdhan Ramhlun North, Ramhlun North Fights Back!

Published & edited by Vanengmawia for and on behalf of Ramhlun North Branch YMA. Copies- 1,270



ADVERTISEMENT

KC TUI

Tui thianglim tak PHE a quality test thlap, PickUp-in 2,000 litre kan pe thei reng e. Ramhlun North veng chung tan discount kan pe e.

Ph: 9774223462 / 7005010327 (10-5)

ST. ANTHONY'S HR. SEC. SCHOOL (3-1)

Chaltlang Lily Veng, Aizawl.

Kum 2026-2027 session atan Class-XI (Arts) admission kan hawng ta e.

(i) Zirlaite hi Zirtirtu tha leh thiam tak tak ten Pathian thu nen an enkawl thin. Kum tinin HSLC / HSSLC Exam ah Result tha tak kan nei thin.

(ii) Kan zirlaite hi Free Spoken English Class pek thin an ni.

(iii). Hostel nuam leh changlung tak a awm bawk e.

(iv) Nitin Thawhtanni atanga Inrinni Inkar, Dar 9:30am - 4:00 pm ah dawr theih kan ni e.

Contact No. 9612131959/ 9862732487/ 8575827857

PUBLIC HIGHER SECONDARY SCHOOL

RAMHLUN VENGLAI: AIZAWL (3-1)

Admission Open: From 10 AM - 3PM

For Class XI

Subject Offered: 1. English 2. Mizo 3. Education 4. Economics

5. Political Science 6. History 7. Geography

Ph: 9436782551/ 9862598857



(2-1)

**STAINES' MEMORIAL SCHOOL
ADMISSION OPEN**

For Academic Session 2026 - 27

From Class IX - XII

Available Streams in Higher Secondary :

ARTS | SCIENCE | COMMERCE

Key Features & Facilities :

- Experienced and dedicated teaching staff
- Modern teaching aids
- Holistic education, discipline & values

Limited seats available. Apply now !

Address : Chanmari, Ramhlun Road
Contact no. : 0389-2342261, 7005461509,
7005631048

Regd.No. RF/MZ-768 of 2025 - 2026

K-9

**SEPTIC TANK CLEANING & B/M
BIODIGESTER INSTALLATION
PVT.LTD.**

(3-2)

Address : J-77, Republic Venglai, Aizawl

Proprietor : K.Lalrinfela Contact : 8414881997 / 8837345465

1. Tunlai thiamna hmanga Septic Tank siam B/M Biodigester Septic tank kan khawih thei reng e
2. Biodigester bikah department lam rawn kher lo a direct a biak theih kan ni e.
3. 24 hrs chung a biak theih reng kan ni e.
4. Kum 20 chuang experience nei tawh kan ni.
5. Comode fitting leh plumbing thlengin kan khawih thei e.
6. Biodigester installation (10-50 users) rate hi concern Department: (PHE) estimate siam anga thawh zel a ni.
7. Gov't Approved kan ni e